



Kalaallit Nunaanni eqqartuussisarnermik inatsisip allanngortinneqarnera pillugu inatsisissatut siunnersuutip (Inuit sakkutuujunngitsut pillugit eqqartuussivimmi suliat Nunatta Eqqartuussisuuneqarfianut innersuunneqarnerat) Kalaallit Nunaanni Namminersorlutik Oqartussanit akuersissutigineqarnissaa pillugu Inatsisartut aalajangiiffigisassaattut siunnersuut)
(Inuussutissarsiornermut, Niuernermet, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)
(Siullermeerneqarnera)

Demokraatit Naalakkersuisut qutsavigaat suliniuteqarmata, annertunerusumik kalaallit nunaanni innuttaasut, Qallunaat Nunaata akisussaaffigisaata, inatsisitigut illersorneqarnerunissaat suliniutigilermassuk. Tunngaviatigut isumaqatigaarput, naalagaaffeqatigiinnerup iluani assigiimmik periarfissaqarlunilu pisinnaatitaaffeqassasortaaq.

Paasivarpulli, eqqartuussisarnerput inunnet sakkutuujunngitsunut apeqqutinut assigiinngitsunik marlunnik pullaveqartoq, taamaattumik innuttaasunut pakatsinerpassuarnik pilersitsisinnaalluni soorlu assersuutigalugu, Danmark pillaasarnermut inatsiseqarluni, uagut pinerluttulerinermi inatsiseqartugut. Taamaattumik paasiuminaassinnaavoq, sooq inatsisitigut illersugaaneq taama assigiinngitsigisinnaanersoq, Danmarkip susassaqarfik akisussaaffigimmagu, naalagaaffeqatigiinnerup aqqani.

Paasiuminaalaarpoq, eqqartuussisarnermik inatsisip allanngortinnerata taassuma pisariaqartilissaneraa ullormut inunnik amerlanernik sulisoqalernissaq. Maluginiarparpullu, siunertaasoq, Danmarkimiit sulisunik nassiussisarnissaq suliat suuneri apeqqutaatillugit suliaqartussanik. Tamanna pitsaasutut isigaarput. Aammali isumaqarpugut, maannakkut nukiit annikippallaartut sulianut suliarineqartussanut sanilliullugit.

Ungasinngitsukkut KNR-rip saqqummiuppaa, eqqartuussisut arlaqartut uippakajaarnermik eqqugaasimasut. Tamanna ilaatigut inummut ataatsimut suliaasat amerlavallaarlutillu oqimaappallaarmata. Tamanna sulisunut ataasiakkaanut sulerulunnermik kinguneqartarpoq, tassami inatsisitigut illersorneqarnissap qulakkeerneqarnissaa piaarnerpaamik kissaatigineqartarmat. Sulisut suliaasaat uippakajaarnerallu saqqummerpoq, Danmarkimi suliaannut piumasaqaataasut eqqartorneqarneranni. Taamatuttaaq tusarniaanermi akissummi Nunatta Eqqartuussisuuneqarfianit sulisut amerlineqarnissaannik pisariaqartitsineq uppernarsarpaa. Taamaattumik apeqqutaanerpaavoq, nunatsinni eqqartuussiveqarnerup maannamiit amerlanernik sulisoqalernissaa. Pissusissamisoorpoq, Naalakkersuisut tamanna sulissutigiuassagaat, Danmarkip eqqartuussiveqarfitsinnik akisussaanerani. Sulisut tigummiinnarnissaannut sulisunillu amerlanernik ilinniartitsinissamut aningaasaliisoqartariaqarpoq.

Isumaqatiginartipparput, siunnersuummi uani siunertarineqarmat, innuttaasut pisariinnerusumik sukanerusumillu højesteret-imut suliaasangortitsinissamut piffissamik nukinnillu atuivallaaratik danskit ingerlatsinerannut qinnuteqaqqaartassanngimmata.



Ajoraluartumik ima maanna piffissami inissisimavugut, FN-ip isumaqatigiissutaanik allanillu innuttaasut-aamma napparsimasut pisinnaatitaaffiinik unioqqutitsinerpassuaqartumi. Spiralilersuineq, meeqqat atugarliortut aammalu meeqqat angerlarsimaffiup avataanut inissinneqartut, meeqqat innarluutillit, inuusuttut innuttaasullu, inatsisitigut ataataqanngitsut, napparsimasut pisinnaatitaaffiinik unioqqutitsinerit suliallu tamakkununnga assingusut, maannakkut ullutsinni annertuumik ingerlaarput. Innuttaasut paasisimasaqarnerulerput, avammut isiginerulerput aammalu pisinnaatitaaffimminnik ilisimaarinnerulerlutillu ilisimasaqarnerulerput. Qularnanngilluinnartumik oqartussaasunut, naammagittaalliuutinik suliaakkiissutinillu tigusaqartunut, sulisunik pisariaqartitsineq annertusivoq. Taamaattumillu qularutigineqassanngilluinnarpoq, Demokraatit piareersimammata isummersoqataanissamut isummernissaq siunertaralugu, nunatsinni innuttaasut toqqissisimanerulernissaannik inatsisitigullu illersorneqarnissaannik siunertaqartunut.

Taamatut oqaaseqarluta siunnersuut inatsisit atuutsinneqarnerannut ataatsimiititaliamut inersuupparput.